

南無本師釋迦牟尼佛（三稱）

大般涅槃經卷第十三

聖行品第十九之三

「善男子！我觀諸行悉皆無常。云何知耶？以因緣故。若有諸法從緣生者，則知無常。是諸外道無有一法不從緣生。善男子！佛性無生無滅、無去無來、非過去非未來非現在、非因所作非無因作、非作非作者、非相非無相、非有名非無名、非名非色、非長非短、非陰界入之所攝持，是故名常。善男子！佛性即是如來，如來即是法，法即是常。善男子！常者即是如來，如來即是僧，僧即是常。以是義故，從因生法不名為常。是諸外道無有一法不從因生。善男子！是諸外道不見佛性、如來及法，是故外道所可言說，悉是妄語無有真諦。諸凡夫人，先見瓶衣、車乘、舍宅、城郭、河水、山林、男女、象馬、牛羊，後見相似，便言是常。當知其實，非是常也。善男子！一切有為，皆是無常；虛空無為是故為常，佛性無為是故為常。虛空者即是佛性，佛性者即是如來，如來者即是無為，無為者即是常，常者即是法，法者即是僧，僧即無為，無為者即是常。善男子！有為之法，凡有二種：色法、非色法。非色法者，心心數法。色法者，地水火風。善男子！心名無常，何以故？性是攀緣相，應分別故。善男子！眼識性異，乃至意識性異，是故無常。善男子！色境界異，乃至法境界異，是故無常。善男子！眼識相應異，乃至意識相應異，是故無常。善男子！心若常者，眼識應獨緣

一切法。善男子！若眼識異乃至意識異，則知無常。以法相似，念念生滅，凡夫見已，計之為常。善男子！諸因緣相，可破壞故亦名無常。所謂因眼、因色、因明、因思惟，生於眼識，耳識生時，所因各異，非眼識因緣，乃至意識異亦如是。

復次，善男子！壞諸行因緣異故，心名無常。所謂修無常心異、修苦、空、無我心異。心若常者，應常修無常，尚不得觀苦、空、無我，況復得觀常、樂、我淨？以是義故，外道法中不能攝取常樂我淨。善男子！當知心法必定無常。復次，善男子！心性異故，名為無常。所謂聲聞心性異、緣覺心性異、諸佛心性異。一切外道心有三種：一者出家心、二者在家心、三者在家遠離心。樂相應心異、苦相應心異、不苦不樂相應心異，貪欲相應心異、瞋恚相應心異、愚癡相應心異。一切外道心相亦異，所謂愚癡相應心異、疑惑相應心異、邪見相應心異，進止威儀其心亦異。善男子！心若常者，亦復不能分別諸色，所謂青黃赤白紫色。善男子！心若常者，諸憶念法不應忘失。善男子！心若常者，凡所讀誦不應增長。復次，善男子！心若常者，不應說言已作、今作、當作，若有已作、今作、當作，當知是心必定無常。善男子！心若常者，則無怨、親、非怨、非親。心若常者，則不應言我物、他物、若死、若生。心若常者，雖有所作不應增長。善男子！以是義故，當知心性各各別異，有別異故當知無常。

善男子！我今於此非色法中，演說無常，其義已顯。復當為汝說色無常。是色無常，本無有生，生已滅故。內身處胎歌羅邏時，本無有生，生已變故；外之芽莖，本亦無生，生已變故；是故當知，一切色法悉皆無常。善男子！所有內色隨時而變，歌羅邏時異、安浮陀時異、伽那時異、閉手時異、諸胞時異、初生時異、嬰孩時異、童子時異，乃至老時各各變異。所謂外色亦復如是，芽異、莖異、枝異、葉異、華異、果異。復次，善男子！內味亦異，歌羅邏時乃至老時，各各變異。外味亦爾，芽、莖、枝、葉、華、果味異。歌羅邏時力異，乃至老時力異。歌羅邏時狀貌異，乃至老時狀貌亦異。歌羅邏時果報異，乃至老時果報亦異。歌羅邏時名字異，乃至老時名字亦異。所謂內色，壞已還合，故知無常。外之樹木，亦壞已還合，故知無常。次第漸生，故知無常。次第生歌羅邏時乃至老時，次第生芽乃至果子，故知無常。諸色可滅故知無常，歌羅邏滅時異，乃至老滅時異。芽滅時異乃至果滅時異，故知無常。凡夫無智，見相似生，計以為常。以是義故，名曰無常。若無常即是苦，若苦即是不淨。

善男子！我因迦葉上問是事，於彼已答。復次，善男子！諸行無我。善男子！總一切法，謂色非色。色非我也。何以故？可破、可壞、可裂、可折、生增長故。我者不可破壞、裂折、生長，以是義故，知色非我。非色之法亦復非我。何以

故？因緣生故。善男子！若諸外道以專念故，知有我者，專念之性實非我也。若以專念為我性者，過去之事則有忘失，有忘失故定知無我。善男子！若諸外道以憶想故知有我者，無憶想故定知無我。如說見人手有六指，即復問言：『我先何處共相見耶？』若有我者，不應復問；以相問故，定知無我。善男子！若諸外道以有遮故，知有我者。善男子！以有遮故，定知無我。如言調達，終不發言非調達也。我亦如是，若定是我，終不遮我；以遮我故，定知無我。若以遮故，知有我者，汝今不遮，定應無我。善男子！若諸外道，以伴非伴知有我者，以無伴故，應無有我。有法無伴，所謂如來、虛空、佛性，我亦如是實無有伴，以是義故，定知無我。復次，善男子！若諸外道以名字故，知有我者，無我法中，亦有我名，如貧賤人名字富貴。如言我死，若我死者，我則殺我，而我實不可殺，假名殺我；亦如矬人，名為長者。以是義故，定知無我。

復次，善男子！若諸外道，以生已求乳知有我者。善男子！若有我者，一切嬰兒不應執持不淨火蛇、毒藥，以是義故，定知無我。復次，善男子！一切眾生於三法中悉有等智，所謂淫欲、飲食、恐怖，是故無我。復次，善男子！若諸外道以相貌故，知有我者。善男子！相故無我，無相故亦無我，若人睡時不能進止、俯仰、視眴，不覺苦樂，不應有我。若以進止、俯仰、視眴，知有我者，機關木人亦應有我。善男

子！如來亦爾，不進不止、不俯不仰、不視不眴、不苦不樂、不貪不恚、不癡不行，如來如是真實有我。復次，善男子！若諸外道，以見他食果口中生涎，知有我者。善男子！以憶念故，見則生涎，涎非我也。我亦非涎、非喜非悲、非哭非笑、非臥非起、非飢非飽，以是義故，定知無我。

善男子！是諸外道癡如小兒，無慧方便，不能了達常與無常、苦樂、淨不淨、我無我、壽命非壽命、眾生非眾生、實非實、有非有，於佛法中取少許分，虛妄計有常、樂、我、淨，而實不知常樂我淨。如生盲人不識乳色，便問他言：『乳色何似？』他人答言：『色白如貝。』盲人復問：『是乳色者如貝聲耶？』答言：『不也。』復問：『貝色為何似耶？』答言：『如稻米末。』盲人復問：『乳色柔軟如稻米末耶？稻米末者復何所似？』答言：『如雪。』盲人復言：『彼稻米末冷如雪耶？雪復何似？』答言：『猶如白鶴。』是生盲人雖聞如是四種譬喻，終不能得識乳真色。是諸外道亦復如是，終不能識常樂我淨。善男子！以是義故，我佛法中有真實諦，非於外道。」

文殊師利白佛言：「希有世尊！如來於今臨般涅槃，方復更轉無上法輪，乃作如是分別真諦。」

佛告文殊師利：「汝今云何故於如來生涅槃想？善男子！如

來實是常住不變，不般涅槃。善男子！若有計我是佛，我成阿耨多羅三藐三菩提。我即是法，法是我所。我即是道，道是我所。我即世尊，世尊即是我所。我即聲聞，聲聞即是我所。我能說法令他聽受，我轉法輪餘人不能。如來終不作如是計，是故如來不轉法輪。善男子！若有人作如是妄計，我即是眼，眼即是我所，耳鼻舌身意亦復如是。我即是色，色是我所，乃至法亦如是。我即是地，地即是我所，水火風亦如是。善男子！若人計言，我即是信，信是我所。我是多聞，多聞即是我所。我是檀波羅蜜，檀波羅蜜即是我所。我是尸波羅蜜，尸波羅蜜即是我所。我是羸提波羅蜜，羸提波羅蜜即是我所。我是毗梨耶波羅蜜，毗梨耶波羅蜜即是我所。我是禪波羅蜜，禪波羅蜜即是我所。我是般若波羅蜜，般若波羅蜜即是我所。我是四念處，四念處即是我所。四正勤、四如意足、五根、五力、七覺分、八聖道分，亦復如是。善男子！如來終不作如是計，是故如來不轉法輪。善男子！若言常住無有變易，云何說言佛轉法輪？是故汝今不應說言，如來方更轉上法輪。

善男子！譬如因眼，緣色、緣明、緣思惟，因緣和合得生眼識。善男子！眼不念言，我能生識；色乃至思惟，終不念言我生眼識，眼識亦復不作念言，我能自生。善男子！如是等法，因緣和合得名為見。善男子！如來亦爾，因六波羅蜜、三十七助菩提法，覺了諸法，復因咽喉、舌齒脣口、言語音

聲，為憍陳如初始說法，名轉法輪。以是義故，如來不名轉法輪也。

善男子！若不轉者，即名為法，法即如來。善男子！譬如因燧，因鑽、因手、因乾秋草而得生火，燧亦不言我能生火，鑽手乾草各不念言我能生火，火亦不言我能自生。如來亦爾，因六波羅蜜，乃至憍陳如，名轉法輪。如來亦復不生念言，我轉法輪。

善男子！若不生者，是則名為轉正法輪，是轉法輪即名如來。善男子！譬如因酪、因水、因鑽、因瓶、因繩、因人手捉而得出酥，酪不念言我能出酥，乃至人手，亦不念言我能出酥，酥亦不言我能自出，眾緣和合故得出酥。如來亦爾，終不念言我轉法輪。

善男子！若不出者，是則名為轉正法輪，是轉法輪即是如來。善男子！譬如因子及地、水、火、風、沃壤時節、因人作業而芽得生。善男子！子亦不言我能生芽，乃至作業亦不念言我能生芽，芽亦不言我能自生。如來亦爾，終不念言我轉法輪。

善男子！若不作者，是則名為轉正法輪，是轉法輪即是如來。善男子！譬如因鼓、因空、因皮、因人、因桴和合出聲，

鼓不念言我能出聲，乃至桴亦如是，聲亦不言我能自生。善男子！如來亦爾，終不念言我轉法輪。善男子！轉法輪者名為不作，不作者即轉法輪。轉法輪者即是如來。善男子！轉法輪者乃是諸佛世尊境界，非諸聲聞、緣覺所知。善男子！虛空非生非出、非作非造、非有為法。如來亦爾，非生非出、非作非造、非有為法，如如來性，佛性亦爾，非生非出、非作非造、非有為法。

善男子！諸佛世尊語有二種：一者世語、二者出世語。善男子！如來為諸聲聞、緣覺說於世語，為諸菩薩說出世語。善男子！是諸大眾復有二種：一者求小乘、二者求大乘。我於昔日波羅奈城，為諸聲聞轉於法輪；今始於此拘尸那城，為諸菩薩轉大法輪。復次，善男子！復有二人：中根、上根。為中根人，於波羅奈轉於法輪；為上根人，人中象王迦葉菩薩等，今於此間拘尸那城，轉大法輪。善男子！極下根者，如來終不為轉法輪，極下根者即一闍提。復次，善男子！求佛道者復有二種：一中精進、二上精進。於波羅奈為中精進，轉於法輪；今於此間拘尸那城，為上精進轉大法輪。復次，善男子！我昔於彼波羅奈城初轉法輪，八萬天人得須陀洹果；今於此間拘尸那城，八十萬億人不退轉於阿耨多羅三藐三菩提。復次，善男子！波羅奈城，大梵天王稽首請我轉於法輪；今於此間拘尸那城，迦葉菩薩稽首請我轉大法輪。復次，善男子！我昔於彼波羅奈城轉法輪時，演說無常、苦、

空、無我；今於此間拘尸那城轉法輪時，如實演暢，常樂我淨。

復次，善男子！我昔於彼波羅奈城轉法輪時，所出音聲聞于梵天；如來今於拘尸那城轉法輪時，所出音聲，徧於東方二十恆河沙等諸佛世界，南西北方、四維上下，亦復如是。復次，善男子！諸佛世尊凡有所說，皆悉名為轉法輪也。善男子！譬如聖王所有輪寶，未降伏者能令降伏，已降伏者能令安隱。善男子！諸佛世尊凡所說法亦復如是，無量煩惱，未調伏者能令調伏，已調伏者令生善根。善男子！譬如聖王所有輪寶，則能消滅一切怨賊。如來演法亦復如是，能令一切諸煩惱賊，皆悉寂靜。復次，善男子！譬如聖王所有輪寶，下上迴轉。如來說法亦復如是，能令下趣諸惡眾生，上生人天乃至佛道。善男子！是故汝今不應讚言，如來於此更轉法輪。」

爾時，文殊師利白佛言：「世尊！我於此義非為不知，所以問者，為欲利益諸眾生故。世尊！我已久知轉法輪者，實是諸佛如來境界，非是聲聞、緣覺所及。」

爾時，世尊告迦葉菩薩：「善男子！是名菩薩住於大乘大涅槃經，所行聖行。」

迦葉菩薩白佛言：「世尊！復以何義名為聖行？」「善男子！聖名諸佛世尊，以是義故，名為聖行。」

「世尊！若是諸佛之所行者，則非聲聞、緣覺、菩薩所能修行。」

「善男子！是諸世尊安住於此大般涅槃，而作如是開示，分別演說其義，以是義故，名曰聖行。聲聞、緣覺及諸菩薩如是聞已，則能奉行，故名聖行。善男子！是菩薩摩訶薩得是行已，則得住於無所畏地。善男子！若有菩薩得住如是無所畏地，則不復畏貪恚愚癡、生老病死，亦復不畏惡道：地獄、畜生、餓鬼。善男子！惡有二種：一者阿修羅、二者人中。人中有三種惡：一者一闍提、二者誹謗方等經典、三者犯四重禁。善男子！住是地中諸菩薩等，終不畏墮如是惡中；亦復不畏沙門、婆羅門、外道邪見、天魔波旬；亦復不畏受二十五有，是故此地，名無所畏。善男子！菩薩摩訶薩住無畏地，得二十五三昧，壞二十五有。善男子！得無垢三昧能壞地獄有，得無退三昧能壞畜生有，得心樂三昧能壞餓鬼有，得歡喜三昧能壞阿修羅有，得日光三昧能斷弗婆提有，得月光三昧能斷瞿耶尼有，得熱燄三昧能斷鬱單越有，得如幻三昧能斷閻浮提有，得一切法不動三昧能斷四天處有，得難伏三昧能斷三十三天處有，得悅意三昧能斷燄摩天有，得青色三昧能斷兜率天有，得黃色三昧能斷化樂天有，得赤色三

昧能斷他化自在天有，得白色三昧能斷初禪有，得種種三昧能斷大梵天有，得雙三昧能斷二禪有，得雷音三昧能斷三禪有，得注雨三昧能斷四禪有，得如虛空三昧能斷無想有，得照鏡三昧能斷淨居阿那含有，得無礙三昧能斷空處有，得常三昧能斷識處有，得樂三昧能斷不用處有，得我三昧能斷非想非非想處有。善男子！是名菩薩得二十五三昧，斷二十五有。

善男子！如是二十五三昧，名諸三昧王。善男子！菩薩摩訶薩入如是等諸三昧王，若欲吹壞須彌山王隨意即能，欲知三千大千世界，所有眾生心之所念亦悉能知，欲以三千大千世界所有眾生，內於己身一毛孔中隨意即能，亦令眾生無迫迕想，若欲化作無量眾生，悉令充滿三千大千世界中者亦能隨意，能分一身以為多身，復合多身以為一身，雖作如是，心無所著，猶如蓮華。善男子！菩薩摩訶薩得入如是三昧王已，即得住於自在之地，菩薩住是自在地者，得自在力，隨欲生處，即得往生。善男子！譬如聖王領四天下，隨意所行無能障礙。菩薩摩訶薩亦復如是，一切生處若欲生者，隨意往生。善男子！菩薩摩訶薩若見地獄一切眾生，有可化令住善根者，菩薩即時往生其中。菩薩雖生，非本業果；菩薩摩訶薩住自在力因緣故，而生其中。善男子！菩薩摩訶薩雖在地獄，不受熾然、碎身等苦。善男子！菩薩摩訶薩所可成就如是功德，無量無邊百千萬億尚不可說，何況諸佛所有功德

而當可說？」

爾時，眾中有一菩薩，名住無垢藏王，有大威德，成就神通，得大總持，三昧具足，得無所畏，即從座起，偏袒右肩，右膝著地，長跪合掌白佛言：「世尊！如佛所說，諸佛菩薩所可成就，功德智慧無量無邊，百千萬億實不可說。我意猶謂，故不如是大乘經典。何以故？因是大乘方等經力故，能出生諸佛世尊阿耨多羅三藐三菩提。」

時佛讚言：「善哉善哉！善男子！如是如是，如汝所說。是諸大乘方等經典，雖復成就無量功德，欲比是經不得為喻，百倍、千倍、百千萬倍，乃至算數譬喻所不能及。善男子！譬如從牛出乳、從乳出酪、從酪出生酥、從生酥出熟酥、從熟酥出醍醐，醍醐最上，若有服者眾病皆除，所有諸藥悉入其中。善男子！佛亦如是，從佛出十二部經，從十二部經出修多羅，從修多羅出方等經，從方等經出般若波羅蜜，從般若波羅蜜出大涅槃，猶如醍醐。言醍醐者，喻於佛性，佛性者即是如來。善男子！以是義故，說言如來所有功德無量無邊不可稱計。」

迦葉菩薩白佛言：「世尊！如佛所讚，大涅槃經猶如醍醐，最上最妙，若有能服，眾病悉除，一切諸藥悉入其中。我聞是已，竊復思念，若有不能聽受是經，當知是人，為大愚癡

無有善心。世尊！我於今者實能堪忍剝皮為紙、刺血為墨、以髓為水、析骨為筆，書寫如是大涅槃經，書已讀誦，令其通利，然後為人廣說其義。世尊！若有眾生貪著財物，我當施財，然後以是大涅槃經，勸之令讀。若尊貴者，先以愛語隨順其意，然後漸當以是大乘大涅槃經，勸之令讀。若凡庶者，當以威勢逼之令讀。若憍慢者，為作僕使，隨順其意令其歡喜，然後復以大涅槃經而教導之。若有誹謗方等經者，當以勢力摧之令伏，既摧伏已，然後勸令讀大涅槃。若有愛樂大乘經者，我當躬往，恭敬供養、尊重讚歎。」

爾時，佛讚迦葉菩薩：「善哉善哉！汝甚愛樂大乘經典，貪大乘經、愛大乘經、味大乘經，信敬尊重供養大乘。善男子！汝今以此善心因緣，當得超越無量無邊恆河沙等大菩薩前，成阿耨多羅三藐三菩提，汝亦不久復當如我，廣為大眾演說如是大般涅槃，如來佛性，諸佛所說秘密之藏。善男子！乃昔過去，佛日未出，我於爾時，作婆羅門修菩薩行，悉能通達一切外道所有經論。修寂滅行，具足威儀，其心清淨，不為外來能生欲想之所破壞，滅瞋恚火，受持常、樂、我、淨之法，周徧求索大乘經典，乃至不聞方等名字。我於爾時住於雪山，其山清淨，流泉浴池、樹林藥木，充滿其地，處處石間有清流水，多諸香華周徧嚴飾，眾鳥群獸不可稱計，甘果滋繁種別難計。復有無量藕根、甘根、青木香根。我於爾時獨處其中，唯食諸果，食已繫心思惟坐禪，經無量歲，

亦不聞有如來出世大乘經名。善男子！我修如是難行苦行時，彼帝釋諸天人等心大驚怪，即共集會，各各相謂而說偈言：

各各相指示 清淨雪山中 寂靜離欲王 功德莊嚴王
以離貪瞋慢 永斷諸愚癡 口初未曾說 麤惡等語言

爾時眾中有一天子，名曰歡喜，復說偈言：

如是離欲人 清淨勤精進 將不求帝釋 及以諸天耶
若是求道者 修行諸苦行 是人多欲求 帝釋所坐處

爾時復有一仙天子，即為帝釋而說偈言：

天主憍尸迦 不應生是慮 外道修苦行 何必求帝處

說是偈已復作是言：『憍尸迦！世有大士，為眾生故不貪己身，為欲利益諸眾生故，而修種種無量苦行。如是之人，見生死中諸過咎故，設見珍寶滿此大地、諸山、大海，不生貪著，如視涕唾。如是大士棄捨財寶、所愛妻子、頭目髓腦、手足支節、所居舍宅、象馬車乘、奴婢僮僕，亦不願求生於天上，唯願一切得受快樂。如我所解，如是大士清淨無染，眾結永盡，唯欲志求阿耨多羅三藐三菩提。』

釋提桓因復作是言：『如汝言者，是人則為攝取一切世間眾生。大仙！若此世間有佛樹者，能除一切梵天、世人及阿修

羅煩惱毒蛇。若諸眾生住是佛樹陰涼中者，煩惱諸毒悉得消滅。大仙！是人若當未來世中，作善逝者，我等悉當得滅無量熾然煩惱。如是之事實為難信。何以故？無量眾生發阿耨多羅三藐三菩提心，見少微緣於阿耨多羅三藐三菩提，即便動轉。如水中月，水動則動。猶如畫像，難成易壞。菩提之心亦復如是，難發易壞。大仙！如有多人，以諸鎧仗牢自莊嚴，欲前討賊，臨陣恐怖則便退散。無量眾生亦復如是，發菩提心，牢自莊嚴，見生死過，心生恐怖即便退散。大仙！我見如是無量眾生發心之後，皆生動轉，是故我今雖見是人專修苦行，無惱、無熱、住於道檢，其行清淨，未能信也。我今要當自往試之，知其實能堪任荷負，阿耨多羅三藐三菩提大重擔不？大仙！猶如車有二輪，則有載用。鳥有二翼，堪任飛行。是苦行者亦復如是。我雖見其堅持禁戒，未知其人有深智不？若有深智，當知則能，堪任荷負阿耨多羅三藐三菩提之重擔也。大仙！譬如魚母多有胎子，成就者鮮。如菴羅樹，華多果少，眾生發心乃有無量，及其成就少不足言，大仙！我當與汝俱往試之，大仙！譬如真金三種試已，乃知其真，謂燒、打、磨。試彼苦行亦當如是。』

爾時，釋提桓因自變其身，作羅剎像，形甚可畏，下至雪山，去其不遠而便立住。是時羅剎心無所畏，勇健難當，辯才次第，其聲清雅，宣過去佛所說半偈：

諸行無常 是生滅法

說是半偈已，便住其前，所現形貌甚可怖畏，顧眄徧視，觀於四方。是苦行者，聞是半偈心生歡喜。譬如賈客於險難處，夜行失伴恐怖推索，還遇同侶，心生歡喜踊躍無量。亦如久病未遇良醫，瞻病好藥後卒得之。如人沒海，卒遇船舫。如渴乏人，遇清冷水。如為怨逐，忽然得脫。如久繫獄卒聞得出。亦如農夫炎旱得雨。亦如行人還得歸家，家人見已，生大歡喜。善男子！我於爾時聞是半偈，心中歡喜亦復如是，即從座起，以手舉髮，四向顧視而作是語：『向所聞偈，誰之所說？』爾時四顧不見餘人，唯見羅剎。即說是言：『誰開如是解脫之門？誰能雷震諸佛音聲？誰於生死睡眠之中，而獨覺寤，唱如是言？誰能於此，示導生死饑饉眾生無上道味？無量眾生沉生死海，誰能於中作大船師？是諸眾生常為煩惱重病所纏，誰能於中為作良醫？說是半偈啟悟我心，猶如半月漸開蓮華。』善男子！我於是時更無所見，唯見羅剎。復作是念：『將是羅剎說是偈耶？』覆復生疑：『或非其說，何以故？是人形容甚可怖畏。若有得聞是偈句者，一切恐怖、醜陋即除。何有此人形貌如是，能說此偈？不應火中出生蓮華，非日光中出生冷水。』善男子！我於爾時復作是念：『我今無智，而此羅剎或能得見過去諸佛，從諸佛所聞是半偈，我今當問。』即便前至是羅剎所，作如是言：『善哉大士！汝於何處，得是過去離怖畏者，所說半偈？大士！復於何處而得如是半如意珠？大士！是半偈義，乃是過去

、未來、現在諸佛世尊之正道也。一切世間無量眾生，常為諸見羅網所覆，終身於此外道法中，初不得聞，如是出世十力、世雄所說空義。』

善男子！我問是已，即答我言：『大婆羅門！汝今不應問我是義。何以故？我不食來已經多日，處處求索，了不能得。飢渴苦惱，心亂謬語，非我本心之所知也。我今力能飛行虛空至鬱單越，乃至天上，處處求食而不能得，以是之故我說是語。善男子！我時即復語羅剎言：『大士！若能為我說是偈竟，我當終身為汝弟子。大士！汝所說者，名字不終，義亦不盡。以何因緣不欲說耶？夫財施者則有竭盡，法施因緣不可盡也。法施無盡，多所利益。我今聞此半偈法已，心生驚疑，汝今幸可為我除斷，說此偈竟，我當終身為汝弟子。』羅剎答言：『汝智太過，但自愛身，都不見念，今我定為飢苦所逼，實不能說。』我即問言：『汝所食者，為是何物？』羅剎答言：『汝不足問，我若說者，令人多怖。』我復語言：『此中獨處更無有人，我不畏汝，何故不說？』羅剎答言：『我所食者，唯人煖肉，其所飲者唯人熱血。自我薄福，唯食此食，周徧求索，困不能得。世雖多人皆有福德，兼為諸天之所守護，而我無力不能得殺。』善男子！我復語言：『汝但具足，說是半偈，我聞偈已，當以此身奉施供養。大士！我設命終，如此之身無所復用，當為虎狼、鴟梟、鴟鷲之所噉食，而復不得一毫之福。我今為求阿耨多羅三藐

三菩提，捨不堅身，以易堅身。』羅剎答言：『誰當信汝如是之言，為八字故，棄所愛身？』善男子！我即答言：『汝真無智，譬如有人施他瓦器，得七寶器。我亦如是，捨不堅身，得金剛身。汝言誰當信者？我今有證，大梵天王、釋提桓因及四天王能證是事。復有天眼諸菩薩等，為欲利益無量眾生，修行大乘具六度者亦能證知，復有十方諸佛世尊利眾生者，亦能證我，為八字故捨是身命。』羅剎復言：『汝若如是能捨身者，諦聽諦聽！當為汝說其餘半偈。』

善男子！我於爾時聞是語已，心中歡喜，即解己身所著鹿皮，為此羅剎敷置法座，白言：『和上！願坐此座。』我即於前，叉手長跪而作是言：『唯願和上！善為我說其餘半偈，令得具足。』羅剎即說：
生滅滅已 寂滅為樂

爾時羅剎說是偈已，復作是言：『菩薩摩訶薩，汝今已聞具足偈義，汝之所願為悉滿足，若必欲利諸眾生者，時施我身。』善男子！我於爾時深思此義，然後處處，若石、若壁、若樹、若道，書寫此偈，即便更繫所著衣裳，恐其死後身體露現，即上高樹。爾時樹神復問我言：『善哉仁者！欲作何事？』善男子！我時答言：『我欲捨身，以報偈價。』樹神又言：『如是偈者，何所利益？』我時答言：『如是偈句，乃是過去、未來、現在諸佛所說，開空法道。我為此法棄捨

身命，不為利養名聞財寶、轉輪聖王、四大天王、釋提桓因、大梵天王、人天中樂，為欲利益一切眾生故捨此身。』善男子！我捨身時復作是願：『願令一切慳惜之人，悉來見我捨離此身。若有少施起貢高者，亦令得見，我為一偈捨此身命如棄草木。』我於爾時說是語已，尋即放身自投樹下，下未至地時，虛空中出種種聲，其聲乃至阿迦尼吒。爾時羅剎還復釋形，即於空中接取我身，安置平地。

爾時釋提桓因及諸天人、大梵天王，稽首頂禮於我足下，讚言：『善哉善哉！真是菩薩，能大利益無量眾生，欲於無明黑暗之中然大法炬。由我愛惜如來大法，故相燒害，唯願聽我懺悔罪咎。汝於未來必定成就阿耨多羅三藐三菩提，願見濟度。』爾時釋提桓因及諸天眾，頂禮我足，於是辭去忽然不現。

善男子！如我往昔為半偈故，捨棄此身，以是因緣便得超越足十二劫，在彌勒前成阿耨多羅三藐三菩提。善男子！我得如是無量功德，皆由供養如來正法。善男子！汝今亦爾，發阿耨多羅三藐三菩提心，則已超過無量無邊恆河沙等諸菩薩上。善男子！是名菩薩住於大乘大般涅槃修於聖行！

大般涅槃經卷第十三

離婆離婆帝 求訶求訶帝 陀羅尼帝 尼訶囉帝
毗黎你帝 摩訶伽帝 真陵乾帝 娑婆訶 (七遍)

南無喝囉怛那 哆囉夜耶 佉囉佉囉
俱住俱住 摩囉摩囉 虎囉 吽 賀賀
蘇怛拏 吽 潑抹拏 娑婆訶 (三遍)

願以此功德 莊嚴佛淨土 上報四聖恩 下濟六凡苦
所有法界眾 悉修菩提行 盡此一報身 同生極樂國